

Penyampai : DATO SERI DR SITI HASMAH BINTI HAJI MOHD ALI  
Tajuk : PROGRAM SISWI CINTA NEGARA 2002  
Lokasi : SHAH ALAM, SELANGOR  
Tarikh : 24-01-2002

1. Terlebih dahulu saya ingin mengucapkan berbilang- banyak terima kasih kepada pihak Wawasan kerana menjemput saya untuk merasmikan program 'SISWI CINTA NEGARA 2002' pada hari ini.

2. Generasi muda hari ini berhadapan dengan cabaran dan realiti yang berbeza daripada generasi yang terdahulu. Generasi pra-kemerdekaan tidak perlu diasuh, dididik, disemai dan disemarakkan semangat kecintaan kepada negara. Semangat cinta negara bagaikan sudah sedia mengalir dalam darah generasi yang menentang penjajahan fizikal secara berhadapan, dan yang pernah merasai pahit maung kehidupan di bawah jajahan.

3. Keinginan untuk memerdekakan negara bagaikan perjuangan yang perlu diselesaikan secepat mungkin tanpa mengira lelaki atau perempuan. Kaum wanita, muda dan tua, mula menyusun dan mengorak langkah untuk berjuang memperoleh kemerdekaan.

4. Bukan sedikit cabaran yang dilalui oleh kaum wanita untuk memperoleh kemerdekaan untuk negara yang tercinta. Generasi hari ini akan menyambung perjuangan itu iaitu untuk mengisi kemerdekaan dengan memajukan negara. Sekali imbas, perjuangan saudari-saudari nampak mudah. Tidak perlu lagi berhadapan dengan tentera penjajah, tidak perlu lagi berhadapan dengan kemiskinan dan tidak perlu lagi berhadapan dengan segala jenis kesempatan dan kesusahan.

5. Sekali imbas, saudari-saudari tidak akan menghadapi segala cabaran yang menyulitkan. Namun begitu, jika diteliti dengan lebih mendalam, cabaran yang bakal saudari-saudari hadapi adalah serius. Era globalisasi adalah era yang amat kompetitif. It is an era of competition - the era for survival of the fittest. Mereka yang tidak cemerlang akan terus ketinggalan.

6. Era globalisasi juga mencanangkan kewujudan 'global values', nilai sejagat yang kononnya dikongsi bersama. Nilai global ini secara halus menolak kepentingan 'negara' sebagai institusi yang penting. Lebih daripada itu, ia menolak kepentingan 'nilai-nilai murni' yang kita punyai, dan digantikan dengan nilai-nilai yang lebih liberal dan tidak bermoral. Membenarkan hubungan seksual secara bebas, keganasan yang melampau yang dipaparkan melalui filem dan muzik - semuanya mengundang penjajahan pemikiran dan nilai generasi muda.

7. Dalam masa yang sama, secara yang amat halus dan terancang, cubaan turut dilakukan untuk mempengaruhi pemikiran generasi muda untuk membenci negara, kepimpinan dan segala institusi penting yang menjadi tunjang pembangunan negara selama ini. Semua ini mesti diteliti dengan minda dan hati yang terbuka.

8. Mencintai negara pada zaman ini memerlukan manifestasi kecintaan yang berbeza. Jika benar saudari-saudari mencintai negara kita yang bertuah ini, ada beberapa tanggungjawab utama yang perlu dilakukan.

Pertama sekali, saudari-saudari semua mesti serius menuntut ilmu. Jadikan kecemerlangan dalam pendidikan sebagai tugas utama. Selaku mahasiswi-mahasiswi institusi pengajian tinggi, kecemerlangan dalam pendidikan mesti menjadi perkara asas.

9. Selain daripada itu, kelompok mahasiswi mesti menjadi agen perubahan dalam masyarakat - an agent of change. Memberi galakan dan kesedaran kepada masyarakat tentang realiti baru. Semarakkan semangat cinta negara di kalangan masyarakat terbanyak. Ketiga, saudari-saudari juga bertanggungjawab meneguhkan jati diri sebagai rakyat Malaysia. Biar kita berfikir, bertindak dan berkelakuan untuk mencapai sesuatu yang terbaik untuk negara kita.

10. Kebanyakan tamadun dunia menghadap keruntuhan daripada dalam - destruction from within. Inilah

iktibar yang perlu kita sedari. Keruntuhan daripada dalam inilah yang perlu kita elakkan. Kita mungkin punya banyak harta, tetapi kita hanya ada satu negara. Malaysia inilah tempat yang perlu kita curahkan segalanya; kesungguhan, komitmen, iltizam, kerja keras dan yang lebih utama, semangat cinta kepada negara.

11. Saya mengucapkan tahniah kepada BALKIS, terutamanya YABhg Datin Seri Zaharah yang mempunyai keinginan tinggi menganjurkan program yang bermakna ini. Tahniah juga kepada WAWASAN dan seluruh jawatankuasa yang terlibat. Semoga, program ini berjaya mencapai matlamatnya untuk memperteguh semangat cinta negara di kalangan generasi muda.